

تاریخ عثمانی انجمنی

۱ شاپ
۱۳۳۲

بدیجی سنه
نومرو ۴۲

مجموعه سی

سلطان سلیم ثالث دورنده

نظام دولت حقنه مطالعات

(۴۱ نجی نسخه دن مابند)

مقداری استانبولده قرار کیر آرام اولدقلری سیدن جمله به استراحت
حضرت طبیعت تانیه اولقله رجال و کبار دولت درون اسلامبولده
افلاکه سر چکش خانلر بنا و انشا و بوغاز ایچنده کذلک رفیع البیان
ساحلخانلر پیدا و مفروشات و اثائلرنده دخی تکلفات عظیمه ایده رک
ابنیه به موافق سائر لوازمات و مطعومات و خدم و حشم و البه و مرکوباتده
حد اعتدالی تجاوز ایتملریله مناصبلرینک ایراد طبعیسی و مالکانه و مقاطعه
وزعامتلیرنک واردات قدیمیسی بر درلو مصارف ضروریه لرینی احاطه
ایتمدیکی اجلدن بالضروره بولندقلری مناصب و خدماتده انواع ارتکابات
و ارتشایه محتاج و مالکانه و مقاطعه و زعامتلیرنی قرق الی سنه مقدم
اولان بدل التزامک اوچ دوت ضعفی مرتبه لریده التزام و ملتزم لر دخی
بدل التزامدن ماعدا کب منافع ضمتنده عجزه رعیته طوق و تحمل لرندن
بیرون ظلم و حور کونا کون ایتمکه جسارت ایتملریله رعایا و برابا ضعفای
لیل و نهار اولاد و عیال لریله عریان و جیمان چالشوب اداء رسومات
محدثه به بذل اقتدار ایده رک اکثری عهده سندن کله میوب بر مقتضای

طبیعت بشریہ احب اماکن اولان اوطان وامکنہ لرینی خواہ و ناخواہ ترک ایدوب نیجہ قصبات و قری بو تقریبہ خراب اولوب باخصوص اهل ذمت رعایاسنک بعضری دول نصاریہ التجایہ مجبور و بونک امثالی حالات وخیمہ حدوثیلہ خرابی ممالک لازم کلدیکندن ماعدا بوکونہ مظالم طاقتکداز اطراف و اکنافدہ اولان عامہ اہالیکن تاب و توانلرینی قطع ایتمکله بلاد و ممالک سائرہ بہ متفرق اولنلردن ماعدا اکثرناس وطنلرنده سلب امنیت حسیلہ مایوساً اولاد و عیالریلہ و متأهل اولیانلری منقرداً ہر طرفدن آستانہ سعادتہ نقل و هجوم ایتمکله قوانین مرعیہ دن اولان تخلیہ دارالسلطنہ قاعدہ سنہ مخالف و منافی تجلیہ دارالخلافتی مستوجب اولمغلہ نیجہ اجناس مختلفہ دارالسلطنہ السنیہ بہ دخول و حلول و اکثری تروج و توطن ایدوب استانبول درونندہ خالی محل قالمیہ جق مرتبہ لردہ بربرینہ ملاصق ابنیہ و بیوت ایلہ کویا اسلامبول بیت واحد منزله سندہ بر شہر اولمغلہ کثرت و وفرت ناسدن ناشی تکون ایدن عفونات آستانہ سعادتک جودت ہواسنی تغیر و افساد و بو وجہلہ انواع علل متعقبنہ بی ایجاب ایلدیکندن ماعدا بلافاصلہ حریرقلر و قوعیلہ دولت علیہ بی بی راحت و متضرر ایدوب درون اسلامبولدن غیری حوالی استانبولہ واقع مدینہ ایوب انصاری و غلطہ و اسکدار و بوغاز ایچندہ خالی محللر قالمیوب احداث اولنان بیوت و مساکن مالانہایہ درونلرنده حد و حصری نامکن نفوس بی حد و غایہ متوطن اولمغلہ کویا همان اسلامبول و اطراف و انحاسی باشلو باشنہ براقلیم صورتی کسب ایدوب مقدما جتیمکان خلد آشیان سلطان سلیمان خان حضر تلری قرقچشمہ صوینی استانبولہ اجرا بیوردقلرندن صکرہ محیئہ مرقومہ دہ قلت میاہ حسیلہ اکثرناس توطنہ رغبت ایتمزلر ایکن ماہ مزبور کلدکدن صکرہ خلقک استانبولہ نوع هجوملرینی مشاہدہ بیورملریلہ تدارک مالزئمہ معاشلری دولت علیہ بہ موجب نقلت اولسی ملحوظیلہ ماہ مزبوری استانہ بہ اجرا بیوردقلرینہ نوع ندامت اظہار

بیوردقلری بمض کتب تواریخده مصرح اولوب الحاله هذه استانبوله
تجمع ایدن ناسک کثرتی اولوقدن اون بش بلکه یکریمی قات زیاده اولدی
بی اشتباه اولغله برزماندن برو دولت علیه نك وزرا ووکلا وامناسی نظام
ملك و سلطته دائر وقایبی ملاحظه واجرایه و قیاب اوله میوب همان
احتساب اغاسی کچی خلقک مائزمه امر معاش ضروریه لرینی فکرواندیشه یه
مجبور واکثریا تحریر اولنان اوامر علیه دخی بو ماده یه محصور اولغله
اختلال احوال ملکه مؤدی وهان قرب وجوار استانبوله واقع بلدان
وامصار اهالیسی دخی انجق نفس اسلاموله مدار اوله جق تدارک مائزمه
اسلامبول واستانه یه نقل ذخائر وکراسته وفحم وخطب خدماته حصر
اوقات ایله اطرافک خرایته بادی اولوب باخصوص لحوم وشحوم
وسائر مائزمه دن ماعدا کافه ناسه کافی نان عزیز تدارکی ضمتده دولت
علیه میری انبارلر بناسنه وجانب میریدن مایعه خصوصه مجبور اولغله
امر مایعه دخی مایعه جیلرک طمع وخیاتی تقریبه خرابی مملکت
ویریشانی احوال رعیته باعث برحالت ناملایمه اولوب بهرکیل خطه
ایچون جانب میریدن مایعه جیلره عن نقد یکر میشر پاره ویریلوب رعایا
فقراسی ایسه جبر اوکرها اکثریا خطه یی اوچ درت قات زیاده اشترا
و نیچهلری دخی اماکن بعیده دن نقل ایتملرله یالکز اجرت نقلیه سی
میریدن ویریلان یهاسنک اضعاف مضاعفه رسیده اولوب بو جمله ایله
اکثر مایعه یه مأمورلر دخی مجرد طمع خاملرندن ناشی معتاد اولان
وجهله اون کیله برکیله عدم قناعت ورعایا فقراسه جور واذیت وکندو
مصنوعلری اولان باشلو کیلر ایله تکمیل ایدوب همان اون کیلی التی بدی
کیل کتوروب رعایا دن زیاده سنک ایچه سی اخذ ایلدکلرندن بشقه کندولری
رعایا دن اخذ ایلدکلری صاف وجید خطه یه صمان واربه وقره مق قارش دیروب
کونا کون حیله دن صکره مغشوش خطه وشعیری سفینه تحمیل واستانه
سعاده ارسال ایلیوب رؤسای سفائن خونهلری دخی اثناء راهده

حوالہ لریٹک بر مقدارنی بیع و بر مقدار صمان دخی رئیس لر خلط ایلد کرندن
 ماعدا انتفاخ ایله زیاده کلک ایچون اوزرینه صودوکوب کرکی کچی
 افاد ایملریله او مثللو صمان و مزخرفات ایله مخلوط رطوبتلی اجناس
 ذخائر میری انبارلره وضع اولنوب مدت قلیله ده سمیت مرتبه لری
 متعفن اولغله بر طرفدن خبازلره توزیع اولنوب طبخ اولدوقده اکل
 ایدن بیچاره لرده نیجه امراضی موجب اولوب و بر طرفدن دخی اکل
 صالح اولیه جق و اکل ایدن حیوانات دخی هلاک اوله جق مرتبه تعفن
 ایتمشی بجره القا اولنوب تلف و خسارت میریه بی مستوجب اولدینی
 مستفی عن الیان اولوب خلاصه مقاله تفصیلی موجب کلال اوله جق
 مرتبه لرده اشبو داراللطنه العلیه ده ملوک عظام حضراتک مدت مدیده
 اقامت و اراملری نیجه محذوراتی مشتمل باخصوص انهامک حضور حضرت
 ایله هزار محذوراته بادی و استانه سعادتده تجمع اجناس مختلفه یه مؤدی
 اولوب لکن خلقک حضرتدن منعی و زحام ناسک جبرا و قهرا دخی
 ممکن اولماقده بو محذوراتک دخی خصوصه حکیمانه تدبیر ضمنده شوکتلو
 کرامتلو ولی نعمتمز اقدمز حضرتلری اسلاف کرام و اجداد عظاملری
 ملک مرغوبلری اوزره وقت مناسبه برمنوال محررکاه محروسه ادرنه
 وکاه محیه بروسه جانبلینه توجیه وجهه اقبال بیوردقلری صورتده
 تنقل مکانک مستجمع و مستلزم اولدینی منافع بی نهایته ملکیه رونما اوله جنی
 ظاهر و هویدا باخصوص بحمده تعالی شوکتلو مهابتلو کرامتلو ولی نعمتمز
 اقدمز حضرتلری جوانخت و جوانسال و صاحب جلادت و اجلال
 اولدقلرندن بومقوله حرکت باهره البرکته میل و رغبت بیورملری امید
 کرده بندکان صداقت نشانلری اولغله بوکونه نقل و حرکتک بالاده
 بسط و بیان اولدینی وجهله منافع عدیده ملکیه شدن بشقه مبارک وجود
 هایونلریته دخی تبدل آب و هوا و حرکت فرح بیما خصوصا بر مدت
 انجره استابولدن تخلیه دماغ ایله منافع لایحصاسی هویدا و جمیع اطرافده

وممالك اعداده بومثلو حرکات دلیرانه شاهانه لری ناموشان جهانگیری ایله ولوله دار اولسی بی اشتباه اولوب اوائل ظهور سلطنت علیه مرتبه لرینه قریب دولت علیه لری کسب قوت ایتمک مأمول ومنتظر ودولت علیه نک کوبریلی محمدپاشا مرحوم وزارتنده کسب انتظام ایلدیکی مثللو اشبو کونه تدابیر حنه ایله همان تجدد درجه لرنده مؤیدمن عندالله اولان دولت ابدیوند جهاننداری رونق نما اوله جنی درگاه حضرت ملک متعاندن نضرعکرده بندکان صداقت عنوان واعیاندر .

در بیان تقویت واستحکام حدود وثغور اسلامیة

احوال ملک وسلطته دائر کتب متنوعه تجارب الامصارده محرر ومین اولدینی اوزره حوزه ممالکی کمال وسعت ایله برقاچ اقلیمی مشتمل اولان دولت شامحه الارکان قویه البیانک سائر مترصد فرصت اولان اعادی صغیره سندن ماعدا جوانب ثلثه سنده اوچ قوی دشمنی اولوق از قدیم لوازم وسعت ملکیه دن اولوب بحمدہ تعالی دولت علیه ابدی القرار فیحہ الممالک قظرارضک بمدوح ومعتبر ومحود ملوک وسلاطین اولان خطه عظیمه نه مالک آناطولی وروم ایلی اقالینک قطعات مرغوبه سی قلمرو سلطنتی اولقله کتب قدیمه ده بر منوال محرر هر ملک عظیمک احوالی بسط اولدینی اوزره اشبو دولت علیه ابدی القرارک دخی ابتداء ظهورندن برو عجم ونمچه وبرزمان لهلوا یکن الیوم لهلویه جمهوریت تقریبه ضعف کلی طاری اولقدن ناشی یوزسنه مقداری اوقاندن برو لهلویه بدل مقولو ظهور واقوای اعادی دولت علیه اولوق صورتی کسب ایتمکله اشبو اعادی ثلثه قویه دن اعجام ممالکی نادرشاه انعامندن سکره مستقل ومتبدشاه تملکنه داخل اولیوب همان صورت طواغفده هرچ ومرچ ورافضیت شومیه کندو بلالرنی بولوب باشلری دردنه

دوشدکرینه بناءً بحمدہ تعالیٰ دولت علیہ شمدیک او طرفدن مأمون
 الفائلہ اولوب لکن ینہ دائماً احوالترینہ چشم وکوش اوله رق کمال تیقظ
 واتباه ولوازم حزم و احتیاطہ رعایت هر تقدیر اهم مهامدن ایسه دخی
 الحاله هذه اولطرفلرده واقع قلاع سلطانیہ ونغور خاقانیہ به عجله تقیدایله
 تعمیر وترمیم وارسال طوب وجبه خانہ وجمع ذخائر ومجدداً تخریر عساکر
 غایت مقتضی اولماقده دولت علیہ اولطرفلر ایچون کلی مصارفه کرفتار
 اولیه رق بغداد وبصره طرفلرینی بغداد والیرینک عهدہ کفایتلرینه
 قرص وارضروم طرفلرینی اول جانبیک ولایه وضابطانہ احاله ایله
 اراقده کیفیات استحکاملرین تفحص وتجنس وتخریدن خالی اولیه رق
 بغداد والینہ وقت وقت مؤکد اوامر علیہ اصدار کذلک قرص وارضروم
 ولایه وضابطانہ دخی اقتضایدن تاکید واهتیمی حاوی پی در پی نشر
 مناشیر و اوامر جلیله ایله اظهار تیقظ واتباه اولغنی حالاتی کفایت
 ایلوب نمجولو دخی صورتا هر نه قدر دشمن قوی ایسه دخی درون
 ملکندہ کویا مشترک سلطنت مثلونجه سربست برنجیہلر ودوقلر وماجارلو
 سربستلری غائبه لرندن بشقه متقل قرال صورتلرینی کسب ایتمش
 هر سکر والکتورلر کرکی کبی اطاعتلرنده اولمادقلرینه بناءً وجمله دن زیاده
 ینلرنده ضدیت وعداوت قدیمه درکار اولان بروسیه قرالی کبی قوی
 ومتین دائماً فرصت بین دشمنلرندن احترازلرینه ابتناءً فی الحقیقه ملحوظ
 اولان مرتبه لرده قوتی کالده اولدیفندن بشقه هنوز صدمات شمشیر
 جهانکیر عثمانی باخصوص قهر وغلبه حضرت سلطان سلیمان خانی جمله سنک
 خاطر نشان و نصف ممالکی مرتبه لری یازده رخس غزات صاحبقرانی
 اولدینی الان نیچه تخریب اولغنی اثار قلاع وبقاعلرندن مشهودلری از جمله
 اردل جانبنه بونجه زمان دولت علیہ طرفدن قرال نصب اولدینی
 معلوملری اولمقله تاریخلرنده مسطور قهر وغلبه ملوک ماضیه عثمانیه دن
 جمله اها لسنک بابالری و دده لری لسانلرندن معلوم وسموعلری اولان

نیجه وقایع دهشت انکیزدن حالا جمله سنک درونلرنده انا رخوف و خشیت جایکیر اولوب و نمچه لونک بر طرفی اوتنه دن برو مغلوب و مقهور لری اولدقلری بوسنه دلاور لری ایله هم محدود و بوسنه اهالیسی دخی غیرتکاری دین و دولتدن بشقه کندولرینک املا کلرینی و اولاد و عیالرینی حفظ ایچون جان و یاشلرینی فدا ایلیه جکری مجزوملری اولغله اول طرفدن کلی ظفریاب اولقدن نومید و اطراف سائره سی دخی روم ایلی دلاور لری و ارنانود یغما کر لری ایله مالامال و هر جانیدن مملکتلرینه دخول آسان و دولت علیه ایله هم محدود اولان قلاع و اراضی سائره لری همان روم ایلی ملحقاتیدن منلو ضبط و تملکه و اکتساب منافع ملکیه یه جیبان اولغله دائما جنک و جدال ملحوظ خاطر ملعننت بیته لری اولدقجه اشبو ملاحظات و سائر ملحوظاتلرینی دریش ایدره رک مغلوبیتلری واقع اولورسه حاللری یمان اوله جغنی تفکر و اندیشه دن خالی اولما دقلری حییله همان ادنی بهانه ایله باشلوباشلرینه دولت علیه ایله محاربه یه تصدیلری اکر چه ظاهر ا امر مستبعد اولوب لکن هر نه حال ایسه یه دشمن قوی اولملریله اصلا و قطعاً اول طرفدن غفلت و تقصیر ایتمکدن بر لحظه ذهول اولنیه رق اول جانبلرده واقع قلاع و بلیقه لر معتمد و دیندار و مستقیم و نفس الامر ده امین طمع و ارتکابدن معرا و میرا امانا تعیینی ایله کرکی کبی تعمیر و تشید و مهمات و ادوات حربیه لرینی تکمیلدن ماعدا وقت اقتضاده دشمنه کوکس کروپ فدای باش و جان ایدره جنک و معاذالله ادنی بر ثقلت ایله قلاع سلطانیه بی دشمنه تسلیم ایتمیه جنک نفرات غیرتسات ارسال و اقامت ایتدیر ملک خصوصنده ولایه و سائر ضابطان معرفتلیله دقت و اهتمام ایله دائما تجسس و اختیاردن منفک و خالی اولمیان دشمنه قارشولوازم تقویت و استحکاملری اهم مهمامدن ایدوکی غنی عن الیان اولوب قالدیکه بر منوال مقرر مقتضای وسعت ملکیه اوزره دائما معادات و ترصدلری درکار اولان اعادی نلته قویه دن الیوم

دولت ابد پیوند اقبای اعادی، روسیاهی روسیہ لو ملاحینی اولوب پترو دیدکری قرال بدفعالرندن برو طور آخر کیسلہ یوز سنہ یہ قریبدرکہ روس منحوس دول سائرہ بہ غالب اولہرق دولت علیہ ایلہ دخی مقاومت ومعاداتہ تصدی ایدوب زمان عدالت عنوان حضرت سلطان احمد خان غازیہ بالطہجی محمدپاشا مرحومک سپہالارلنی ایلہ قرال مسفور نہر پروت کنارندہ مدمر ومغلوب اولدینی سفر نصرت اژدن صکرہ اوچ دفعہ در دولت علیہ ایلہ وقوعیافتہ اولان محاربه سندنہ بالاستدرج غلبہ اوزرہ بولنوب باخصوص سفر سابقہ لدی المصلحہ سربستک بہانہ سیلہ تدریجا اقلیم قریعہ کلیا استیلا وبجریاہ مستقلا دولت علیہ نک مرسای سفائن اجلالی ایکن اندہ دخی علاقہ پیدا واولیطہ وکرسون نام محملردہ ترسانہ خیانت نما انشا ایندکدن صکرہ اول حواللردہ علاقہ واستحکام قلاع واجتساد عسا کر منحوسہ سی تقریبیلہ ینہ بو دفعہ دخی بالاستدرج فرستیاب اولوب ضروری ایجاب ایدن مصالحہ دہ دخی نہر طورلہ حد فاصل اتخاذ اولمغلہ برا دخی اراضی روم ایلی یہ تقرب وسائر دشمنہ قیاس اولنیمہ جق جیلہ کاروبی عار وانواع مکائد وملقتی بدیدار برعدوی بدخوی مفدت افار اولمغلہ معاذاللہ شر وفسادلرندن بر لحظہ وبر دقیقہ امین اولیہرق تأییدات خیرالناصرین ایلہ وقت مناسبہ اخذتار وانتقام ومکاید وحیل معلومہ سندن کسب اسایش وازام ضمنندہ ملاعین مسفورین جانلرندہ اولان قلاع وسرحدات ونغورہ بلافاصلہ اقتضا ایدن تقویت واستحکامدہ دقیقہ فوت اولنیموب وبجریاہ کیفیتی معلوم اولمقندن ناشی سفائن وعسا کر بحریہ خصوصندہ مقدار ذرہ تجویز قصور اولنماق فرض عین مثابہ سندنہ اولمغلہ جملہ دن اول طورلہ نہری مقابلندہ واقع بندر قلعه نک تشید واستحکامندہ ودروندہ اقامت ایتدیریلان عسا کرک رابطہ نظامہ کتوریلوب وقت حاجتہ مردانہ ودلیرانہ مقابلہ یہ ایتدار ایدہ جکلری مجزوم اولمق درجہ لردہ تسویہ سندنہ قطعاً تہاون وتکاسل

اولنیموب واسمعیل کچیدی قلمه‌سی خیلی ایشه یرار قلمه اولمغله انکدخی
تأسیس و ممکن ایه بر مقدار تصفیر و كذلك مهمات و عسا کر قویه ايله
تشحین اولمغنه و طورله نك محاذینده اولوب بر مدتدن برو اعتباردن
ساقط اولمغله تمیر و استحکامی اھال اولنان افکرمان قلمه‌سی دخی همان
اوزی بدلی اولق اوزره تشید و تأسیس اولمغنه کلی بذل همت اولنوب
له مالکی مقابلنده واقع خوتین قلمه‌سنك اصل و صنئی موقعده اولیوب
باخصوص از رانجه طرفدن دخی طوبلتوب بر قلمه نایجا و مستعد استیلا
اولمغله بوکونه عدم ثنات و حصاتی معلوم دشمن اولمقدن ناشی اعدای
دین ملتت آیین هر سفرده اولا خوتین قلمه‌سنی استیلا ایلوب توحیش
و تدهیش عسا کره و مملکت بغدادنه اول طرفدن دخوله توسل ایلدکری
بالدفعات مشهود و معلوم اولوب لکن منتهای سرحد اولوب اول طرفده
غایت متین و رصین بر قلمه مستحکمه نك وجود و لزومی درکار اولمغله
بوماده مخصوص ارباب و قوف ايله مشاوره منوط بر امر لازم الاهتام
ایدوکی احوال سفریه به و قوف تامی اولنلرک معلومی اولوب بونلردن
ماعدا اناپه و صوغوجق قلمه‌لری ابازه و چرکس و لایترینک مدار تقوی
اولدیغنه بناه قلمتین مرقومیتنک دخی كذلك تمیر و استحکاملرنده اصلا
توقف اولنیموب باخصوص اناپه قلمه‌سنك یا لکز تمیر و استحکامیله قناعت
اولنیموب دولت علیه اطاعتنه ابازه و چرکس قوملرنی استمالت و تدابیر
متنوعه ايله کلیا جلب ایچون قلمه مرقومه ده عاقل و مدبر و کارگذار
و حل و عقد و وفق و رفق اموره صاحب اقتدار بر وزیر نامدار اقامت
ایتدیریلوب سائر محلدن تعیین واردات و منصب احسانیه ضرورت
و احتیاجدن ازاده قلندقدن صکره اولا مشارالیه واسطه‌سیله اقوام
مرقومه میانلرنه معلملر و سوزاکلر مشایخ و علمادان ارباب درایت
کسنلر ارسال و اول طرفلرده کشت و کذار و تمکن ایتدیریلوب الله
و پیغمبری بیلمز اول قوم جاهلینه اصولله تعلیم ادیان و قران و افهام شرایع

وایمان ایله اولی الامرہ اطاعت واجب اولدیفنی تفہیم وایقان ایتدیره رک
 جملہ سنی ملت اسلامیہ اذخال و مطیع امر و فرمان سلطان اسلام ایتیمک
 بذل مقدور ایتدیریلوب نایا چرا کہ واپازہ قوملرینک دلاورلرندن
 یکریمی اوتوزیک بلکہ دخی زیادہ یکیچری اولوق اوزره نقرات تحریر
 و دولت علیہ دن مقدار کفایہ علوفہ تعیین ایله طوب و تفنک ایله آتشارلق
 قنی تعلیم ایتدرمک سرکرده و مملکله مأمور قلوب ابازہ و چرا کہ
 جالی و سائر اولطرفلرده واقع کوهستان کرات معدنی اولمقله بحر سیاهده
 جبال مرقومہ جوارنده مناسب اولان محللرده ازابالی ایله لدی المذاکره
 بناسی مستحسن اولان ترسانه احداث اولنوب مدت قلیله ده جبال مرقومہ
 کرات سندن اون بش یکریمی مقداری کیر قالینلر انشاسی امر سهل
 اولدیفنی ازاب و قوفک معلوملری اولمقله خصوص مرقومہ دخی مباشرت
 بیورلدیفنی صورتده مؤید من عند الله اولان دولت علیہ نک بوکونه قوت
 و سطوتی دشمن دین مشاهده ایتدکده متزلزل اولوب بمونه تعالی اقلیم
 قریم و حوالینی خود بخود تسلیم ایدہ جکلرندن ماعدا ازاوق و طیغان
 قلعه لرینی دخی تسلیمه رام اوله جقلری تأییدات الیه دن و توفیقات
 سبحانیہ دن امید کرده عباد داعیاندر .

در بیان تسویه و نظام ترسانه و انشاء سفائن سلطانیہ

دریای بیکران احسان الہی و قلم فراوان لطف و کرم نامتاهی
 حقلرندہ جوش و کندلری دخی موجا موج عسکر مظفر ایله بوروزکارده
 مانند بحر محیط خروش ایدن ملوک ستوده سلوک عثمانیہ ایله امن سلطنتهم
 بالتأییدات الالہیہ حضراتی بالاستقلال والاستحقاق از قدیم سلطان البرین
 و خاقان البحرین عنوان عظمت نشانی ایله نامزد شهرت و شان اولدقلرینہ
 بناء اول عنوان معلاشان مقتضاسیجہ بیاندن مستغنی اولان وجهله برا نیجہ

فتوحات جلیله به مظهریتلرندن ماعدا بحرا دخی عا کر ظفر مائر دریا
 خروش ایله نیجه جزائر و حصون و قلاع بحریه بی فتح و تخییر ایلدگری
 معلوم خاص و عام اولغله قوت بحریه نك مدار کلیسی انجق وله الجوار المنشات
 فی البحر کالاعلام مدیحیه سیله ستایش کرده اولان قلاع سیاره و طیاره
 مقوله سی اولدیغنه بناءً دنیاده اولان جمیع جزائر و سواحله واقع
 لیمانلرک اعلی واکل و اوقی ایدوکی بالجله جغرافیا کتابلرنده متفق
 علیه اولان بلده طیبه قسطنطنیه خلیجنده واقع لیمان بهجت نشانی سفن
 عدیده متنوعه ایله مالامال ایتمکه صرف همت والانهمترلندن ماعدا سفائن
 ظفر بیما هر تقدیر قلاع هیبت نما ایسه دخی حد ذاتنده جمادات نوعندن
 اولغله اول اجرام عظامک روحی متابه سنده اولان عا کر بحریه و طوب
 و مهمات و ادوات سائر ایله تشحین اولنمنه بذل ماحصل قدرت اولنوب
 حتی عهد قریبه دکین اجرام عظیمه دن اولان قالیون انواعی متعارف
 دکل ایکن شتیبه و قدرغه و چکدرن مثللو صغیرالجرم کشتیلر ایله ستمه
 تقرب اولنق عقلا جواز داده اولیان حصون بحریه بی فتح و تخییر
 از جمله جنت مکان خلدایشان سلطان سلیمان خان حضرتلری بین النصرای
 مالطه کبیر عد اولنوب زعملرنجه فتح و تخییری محال اولان حصون
 منیع دن رادوس قلعه سنی جزیره مرقومده واقع قلاع سائر
 ایله و بلنقه لریله بالنفس موکب هایونلریله واروب بحیر عقول اولان هجمات
 دلیرانه ایله نوجهله فتح و تخییر بیوردقلری کتب توارینجده مفصلامین
 و محرر اولوب والحاصل بوکونه فتوحات جلیله به مظهریت یالکزن سفین
 ایله میسر اولیوب سفاینک روحی و مدار تقویت واعمالی اولان غیرت
 شعار قبودانلر وغزاه و جهاد بحاره مألوف دلاورلر و بحری عسکر ایله
 میسر اولدینی امور معلومه دن ایکن سرورازمه ایله مجرد تفاقلا نه حرکت
 اولنوب مدت و قیرمه انتقطاع اسفار بحریه ایله کرک سفائن و مهمات بحریه به
 و کرک کیفیت عا کر دریا بیما به دقت اولنمنه رق همان ترسانه مصارفی

دولت علیہ بی بیہودہ درجہ عجزہ کتوروب دونما نامیلہ مدت وفیرہ
بمحر سفیدہ بادبانکشا اولان سفائن سلطانیکہ رؤسا وعسا کری یالکنز
سواحل بجزردہ واقع بلاد و امصاری مظالم ایلہ تخریب باخصوص جزیرہ لردہ
متسکن اطہ رعایا لری درد مند لری صومیق خصوصہ حصر ماعی
ایتملرہ نیچہ زمان عباد اللہ ایصال خسران ایدن لاشی مقولہ سی قورصان
وایز بانید مقولہ لری کفریہ مقابلہ ومدافہہ کو ستر میوب ولو بو قدر
مصارفہ بدل مایہ تسلی اولہ حق چورک چاریق برایکی اقدارمہ سفینہ سی
دخی کتور مکہ مقتدر اولہ میوب بحرا حج شریفہ عزیمت ایدن مسلمین
وسائر تجار قورصان بلا سیلہ مستامن سفینہ نہ محتاج اولق کیفیتی دخی
ارتکاب اولنوب امور ترسانہ بو کونہ تختل ومشوش ایکن بنہ مصارفی
بی نہایہ وبر قاچ سہدہ بر قالیون اینر ایسہ دولت علیہ یہ اون قات بہاسہ
اولدیندن بشقہ کراستہ وسائر مالز مہ ترسانہ یہ مخصوص قضالر کراستہ
بدلی اچقہ اخذی وسائر تسلط ایلہ خراب ویباب وفقرای رعیتک جکر لری
کباب اولوب یابدق لری قالیونلر دخی اورصہ یہ چقمز ومحاربہ یہ یارہ مز
قیچ طرفی متعدد او طہ لرو قارہ لر ایلہ مملو اولدیندن ماعدا کراستہ سنک
صوبی طملا یوب یاش ایکن میخلنغلہ بر قاچ نہ مرورندہ صوبی چکیلوب
اچلدینہ بنأ صو ایدوب اکثر یا روی دریادہ ادنی تلاطم ایلہ بلی قیریلوب
وبعضا غرق اولدینی بالدفعات مجرب اولوب واردات ترسانہ سراق
وخونہ رجال ترسانہ یہ ما کل وسالیانہ قپودانقلری دخی کذلک مر قوملرک
ما کلی اولوب قالیونچی نامیلہ بولنان عسا کر دخی تجار مقولہ سی بی عار
وی غیرت همان اعراض ناسہ تعرضدن غیر ی بر عملہ یارہ مزار ایکن
قپودانقلر ارتشا ایلہ نا اهلہ فروخت اولنہ رق احوال بحری بیلمز کمنہ لر
قپودانلق اشترا وقالیونچی علوفہ سی نامیلہ طرف میریدن اعطا اولنان
مبالغ کلیہ ایلہ دخی بینلرنده اقسام والتقام اولنوب بیہودہ تلف اولغلہ
بومثللو تفصیلی موجب کلال اولان اعمال وحرکات ردیہ ایلہ احوال

ترسانه مختل و مشوش ایکن سکان ایکی سه‌سندہ مباشرت اولنان مسقو
 سفرندہ ملاعین روس منحوسک بحربالطق بوغازندہ پیدا ایلدیکی ترسانه
 منحوسندن کلینلو سفائن جیمه‌سنه انکلیز قبودانلرنندن برلمین نامداری
 اداره امور سفریه بحریه ایچون کلینلو مبالغ ایله استیجار و بحربالطق
 بوغازندہ و ممرسفائن منحوسه سی اولان محلرده منع و دفعنه مقتدر اولان
 دول نصاری دخی اغماض ایتملریله بحرسفیده طوغرو شرعکشیای ملعت
 اولدقلرنی بعداللیتا والئی دولت علیه تصحیح ایتمکله علی الاستمجال کهنه
 وجدید کلینلو سفائن وطوب و مهمات و فیره ایله برعظیم دونما اخراج
 بیوروب لکن بالاده ببط اولدینیی اوزره کرک سرکرده دونما و کرک
 سائر رؤسا و عا کر احوال حروب بحریه دن غافل و حیل و دسائس
 دشمنن ذاهل و اکثر عا کری دخی دوشرن و اطراف بلدانن جبرا
 و قهرا جمع اولنمش ارغاد و چفتجی مقوله سی اولغله الات سفائی اعمال
 دکل سفائن روی دریاده ادنی تلاطم ایله حرکت ایلدکده ایاق اوزرینه
 طوروب مشیه قدرتلری اولمادقلری روسیانک معلوملری اولوب روس
 منحوس دونمائی ترتیب و نظام اوزره بربرینک اوداسندن کلدیکی
 منظورلری اولدقده هنوز مقولو دونمائی کلینلو سفائن دولت علیه یی
 مشاهده ایلدکده خوفه تبعیت ایله اماده فرار ایکن اول گروه خائفین
 و غافلین بیوده دهشته کرفتار و خوف و اضطرابه دوچار اولملریله قهقری
 رجعت و بلا موجب عودت ایله متغافلانه چشمه لیماننه دوشوب هنوز
 دشمن ظهور ایتمه دخی کندو باشلرینه اول محلدن یکریمی اوتوز کونه
 دکین خروجلری ممکن اولیان وجهله بربری اوزرینه مالا مال اولدقلرنی
 مقولو ملاعینی اختیار و بوحالت و کیفیتن شاد مرکه اوغرامق درجه لرنده
 مسرور اولوب همان فرصتدر غنیمتدر دپه رک بر ایکی بومبه کیسی تعیر
 اولنان اتش فشان کشتی ملعت نشان ایله اولیله کلینلو دونمائی و نیجه اموال
 و خزائن صرفیله وجوده ککش جبال شاهقه مثللو قالیونلری مهمات

وادواتیله احراق بالنار والی الابد فراموش اولمیه جق مرتبه لرده وکلای دولت علیه بی دلسوخته خسار ایدوب بو تقریب ایله بلا تمب ولامشقه بحر سفیده استیلا وانواع وخامتی درکار اولان قینارجه مصالحه منه کلنجه قدر بحر سفید بوغازی قبانوب سکان اسلامبول طوق و تحمیلرندن بیرون مشقته گرفتار اولوب حتی اولوقته دولت علیه مقابله اعدایه نوعما مدار اوله جق مرتبه لرده محالّه سفائن انشاسنه مقتدر اولوق ممکن اولدیغی اجلدن بالصروره وندیك جمهورندن وسائر ظاهرا دوست کچن دولدن اضعاف مضاعف بهار یله علی الفور بش اون قطعه جنک سفائی اشترا اولمق ایچون استانه سعادتده مقیم ایلیچیری واسطه سیله تحریر و اخبار وطلب بیورلمغله مدت و فیره امرار لرندن صکره بی ادبانه یازدقلری جواب ناصوابلری مآلده بویله حرکات حربیه دولتین عظمتین انشاسنه جنک سفائی مبابعه سی قاعده حزم و احتیاطه منافی اولدیغندن ماعدا بزیر اکثر ادوات و مالزمه سفائی بمالك سائره دن تدارک مجبور ایکن لیمانلر یزده بر قاج طاقم دونمایه وافی متعدد سفائنمز موجود اولوب دولت علیه ایسه انشای سفائن اراده بیوردقلرنده جمیع مالزمه سی کندو ملکر نده موجود ایکن غافلانه حرکت ایله همان بر طاقم دونما سفائی تدارک و بحره چیقان سفائن حربیه ده هر درلو خطر ملحوظ ایکن نیچون بر قاج طاقم دونمایه کفایت مقداری سفائن ترسانه لرنده احتیاطا موجود بولمادی دیو حرف اندازلق وادیلرنده بعض کلمات ناسزا تحریر یله همان الکفر ملة واحده قاعده سی اوزره اظهار ملعنّت وخبانت و بر قطعه سفینه مبابعه ایتمکدن نکول و ابا ایتمریله مفسور لرك اشبو کونه معامله لری حالا نقش ضمیر ارباب وقوف اولمغله بونلر هیجان غیرته مؤدی ایدوکی رونما ایکن بعد المصلحه یه امور ترسانه کرکی کبی تسویه علی الخصوص عا کر بحره ترتیبی اصلا تنظیم اولمق سزین بو دفعه دخی یه مقو سفرینه مباشرت اولمغله اثار تأییدات الهیه دن اولمق اوزره اسوجلونک مقولویه

معاداتی و اعلان محاربه سی بحر بالطق جانبندن مقولونك سفائن منحوسه سی بحر سفیده سروردن هر قدر حاجز قوی اولش ایسه دخی ملاعین روس منحوس سفر سابقدن صکره انواع مکر و حیلہ ایله خطه قریبه کلیاستیلا و اثناء مصالحه قینارجده قلوبون و یکی قلعه و کرش قلعه لرینی دخی اختلاس ایشم بولندقری اجلدن اق صو نهری اوزرنده مجدد اپنا واحداث ایلدکری کرسون نام بلده مکر و هه لرنده و اولیطه و کرش جانب لرنده ترسانه پیدا و بیاق قالدیرر سفائن و فیره انشا ایلیوب بوتقریبله بحر سیاهده کلی علاقه و مدخلیت تحصیل ایلدکری اجلدن دولت علیه طرفندن غیر متمم الادوات درمه چانه مقوله سی محجزه کروهندن نقرات ایله تسیر و اخراج اولنان دو نهای دولت علیه به نه کونه مقابله ایلدیکی بیاندن مستغنی برحالت عبرت انکیز اولوب خصوصا اشبو سه لدی المقابله دو نهای دولت علیه سفائی شکته به عودت ایدوب مقولودو نهای امنه بورنی نام محله لکر انداز نحوست اولدینی استماع اولدقدنه نه مرتبه لرده موجب دهشت و اهالی اسلاموله نه درجه لرده باعث وحشت اولدینندن ماعدا اراذل و اشقیانک اولوقترده آنهاز فرصت صورت لرنده خلقی نه مرتبه لرده توحیش ایلدیکی معلوم ایکن به اثار تأییدات الهی بدن اولمق اوزره اولوقته متارکه خبری مددرس تسلی قلوب اولسی و ارسته قید تفصیل و بیاندن الحاله هذه ملاعین روس منحوس اقوای اعادی دین و دولتندن اولدینی اشکار و حیلہ و ملعننده دقیقه فوت ایتمیوب دأما متیقظ و اتهاز فرصته مترقب اولدق لری مکاند و مفسد ت لرندن بدیدار اولوب اقلیم قریم و ملحقات سائر می زیر دست لرنده اولمق حیلله بحر سیاهده علاقه کلیه پیدا و بعد ازین موجود اولان سفاین لرندن ماعدا ترسانه منحوسنده انواع سفائن حربیه انشا ایده جک لری ظاهر و هویدا اولغله اشبو عقد اولنان مصالحه متوهنه به قیاس چند سال مرورنده تکرار کند و ملکنه و عسکر خبانت اثر نه و بحر سیاهده و بحر بالطقده اولان سفائن منحوسه نه کرکی

کبی نظام ویرمکده دقیقه فوت ایتمیوب اماده ملعت و فسح صلحه مبادرت
ایده جکی هان درجه جزم و تیقنده اولوب شاید ترسانه دولت علیه نك
بوکونه عدم نظام و تقویتی اناسنده سفر اقتضا ایدرسه دول نصاری اکثریا
الکفر ملة واحده طورنده اولوب بینلرنده انواع شروط فاسده لری
اولغله موازنه مرعیه قاعده لرینه رعایت ایتمیرهك یا خود موازنه لرینه
صورت اخری کسب ایتمیرهك یه بحر بالطقدن بحر سفیده کلان
دوئمانه بحر بالطق بوغازنده وسائر محرفان منحوسه سی اولان دول
نصاری ممانعت ایتمیوب سفان منحوسه سی بر طرفدن بحر سفیده و بر طرفدن
بحر سیاهه تراکم ایوب معاذالله دولت علیه بی برا اولان تضیقدن بشقه
بحر ادخی اشد تضیق ایله تضیق ایلمسی حالات مجزومه دن اولغله اشبو
محدورات واجبه الاحترازك قبل الوقوع چاره سی کورلمکه تشبث و اقدام
ولیل و نهار بذل ماحصل اقتدار فرض عین مثابه سنده اولمقدن ناشی اهل
و قوفدن مؤتمن و معتمد علیه ذوات خیر خواهان دولت ایله امور ترسانه
مذاکره و مشاوره اولنهرق رجال ترسانه نك بی حد و بی نهایه بهوده
مصارف و اسرافات لری تنزیل و تخفیف و چکدیری پاشاقلری رفع و انلره
متعین مبالغ و فیره امور ترسانه یه تخصیص و دریا قلمنده اولان کلی ایراد آتی
بدیدار زعامت و تیمار اربابی سفر لرده بر اجهلك ایشه یاره میوب و بوندن
صکره دخی یاره میه جقلری مشهود و معلوم اولغله دفعه رفی نامناسب
اولدیفنه بناء محلول اوللری بر کسبه یه توجیه اولنمیوب مصارف ترسانه یه
صرف ایچون خاص باغلمق اوزره شمیدین خط شریف اصدا ریوریلوب
وسائر وجوه ایله ایرادات ترسانه تکثیر و توفیر اولنمنه کلی اهتمام و دقت
اولنهرق رابطه نظامه بند و بعد ایوم انشا اولنهرق سفان مصارفه کلی
نظارت ایله برسینه اوج دردت قات بهاسنه اولماق خصوصنه اهتمام و ترسانه
کراته سنه وسائر لوازمه مربوط قضالر مائزمه ترسانه دن معادا کراته
بهاسنه وسائر وجوهله یازده تخیرت و خسارت اولماننه همت ایله

شمدنصره اعمال اوله جق سفائن همان برقاچ سنه ظرفده محو وتلف اولماق ایچون انکلیز و فرانسیز مرانفوزلرندن انشای سفاینده ماهر استادلر جلب و اقتضا ایدن اجر تارنده زیاده جه ساحت اولنوب انشای ایده جکری سفاین دول نصاری سفاینی مثللو قرق اللی سنه طیانمنه و متانت و حصانته اهتمام ایللری خصوصی کندولرندن مطلوب اوله رق اطماع و استمالت ایله هر بر صنعتلرین اجرایه تشویق باخصوص قدیمدن برو دولت علیه سفاینی دریایه نزولی وقتنده مانی شکست اولدینی مشهور اولمقدن ناشی صنعت جراثقال ایله اصلاح خطر کتوریه رکه دول نصارانک سفینه تزییل خصوصنده اولان صنایع غریبه لرینی اجرا و سفاینک لیمانده چورومامک خصوصیچون اعمال ایتدکلری صنعتلری تأدیه و ایضا ایتدیریلوب بو وجهله کرک ترسانه و کرک سینوب و استانکوی و رادوس و مدلو طرفلرنده و سائر مناسب اولان محللرده و چند سال مقدم اولدینی مثللو افلاق و بغداد و یوده لری مباشرت لریله قلاص جانبنده انواع سفاین انشاسنه مبادرت و اقدام اوله رق ایشه یرار جنک سفینه لر یله ترسانه هایون مالا مال اولوب لکن بالاده ببط اولندینی اوزره هر بر سفینه بر قلعه متینه سیاره ایشه دخی فی حد ذاته جمادات و جسم بی روح قیلندن اولقله همان روح مجسم اولماسنه همت و مقتضی اولان طوب و کله و مهمات سائر ایله تشخیص باخصوص شمدیه دکن دولت علیه باروتخانه لرنده اعمال اولتان باروت ایشه یرامدینی و اجرای اتشازی به غیر موافق ایدوکی شاهد و معلوم اولقله انکلیز باروتی عیارنده باروت اعمالنه دول نصاری صنایعی اوزره همت و اول نوع باروت تدارکنه اهتمام تام اولنوب و مقدماتی تحریر اولندینی اوزره دول نصارانک حروب بریه و بحریه به دائر مؤلفات جدیده لری و صنایع هندیه لری تدارک و بروجه استعجال ترجمه ایتدیرلرکن صکره قبودانان و سائر

ضابطان ترسانہ یہ وبالجملہ نقرات بحریہ یہ صنایع مزبورہ میں تعلیم و تفہیم ایچون انکلیز و فرانسز استادان فن بحریہ میں کذلک اطماع و اسالت ایلہ جلب و طوب اندازی و بحرا آتسبازی و خریطہ فنی کرکی کچی خارجہ چیفارمق مرتبہ لرنده تعلیم و اتقانه صرف مقدور اولنوب و بعدالایوم قنون بحریہ میں بیلیمان مجھول الحال کمنہ لہ اصلا قبودانلق و برلیوب کذلک قالیونجی نقراتی دخی منتخب و جکر دار کمنہ لردن اولمق ایچون ضابطان لری اہتمام ابدوب و بر طرفدن دخی نقرات مرقومہ تکثیر و توفیر و مخصوص قشلاقلر و مکنلر بنا ایتدیریلوب لدی الاقتضا سفینہ لک قالیونجی نامیلہ طوبجی و ساری مکمل اولوب فقط وقت حاجتدہ خارجدن نام الاسلحہ و ایشہ یرار بحر ایلہ مألوف تنک انداز لوندا تلافی وضع اولنلق خصوصندہ دخی اہتمام و دقت مقتضی اولوب و قالیونجی کروہندن مقدا کمرک التامقلہ ہرکس قالیونجی اولمقہ ہوسکار ایکن بر مدندن برو قالیونجیلرک کتوردکری امتعہ جزئیہ دن دخی کمرک التامقلہ قالیونجی قلتنہ بادی اولدی دیو ینلرنده مشهور اولمقلہ بو خصوصی دخی تفحص ایلہ نفس الامر دہ واقع ایسہ کالاول مایہ تشویق اولمق ایچون خصوص مذکور دہ دخی مساعده اولنلق مقتضی اولوب و برنوال محرر قالیونلر امادہ و مازمہ لری تکمیل اولندقدن سکرہ قدیمدہ اولدینی مثلومیری قالیونلر مصر جانبدن و سائر محللردن نقل ذخائر و اشیای سائرہ ایچون تعیین اولنوب نقراتی بو تقریب ایلہ احوال دریایہ و کیفیت اعمال سفاینہ واقف اولوب بحر ایلہ اشتلاف ایلدکلرندن ماعداتجار مالی تحمیلنہ دخی تعیین اولنمقدہ دخی بآس اولمیوب نول سفاین دخی مصارف ترسانہ یہ مدار اولوب نقل ذخائر و اشیای سائرہ خصوصندہ مستامن سفاینہ احتیاجدن رھایاب اولوب و قالیونجی عسکری ترتیب و تعلیمی قرہ عسکری ترتیب و تعلیمندن اسهل اولوب خصوصا اطہلر رعایاسندن ملاحق دہ ماہر اولنلرنی استخدام و اعمال

ممکن اولدینی جهتدن خصوص مرقومه دخی دقت اولنوب والحاصل ترسانه اموری کلی تنظیمه محتاج اولمله اقتضا ایدن تدابیری اعمال ایله میری قالیونلردن ریاله و پاترونه وسائر اون بش مقداری سفاین حاضر و نفرات و مهمانی مکمل اولوب و درمخزن بولنوب هر سفینه نك معتبر قبودانی وسائر ضابطانی را کب اولدقلمی سفینه به متعین اولوب ونفرات مخصوصه لرینی بیلوب و اوزر لرینه دائما نظارت ایله لدی الاقتضا اوج بش کون ظرفنده مهیا و دریایه چیتمق اوزره آماده بولنلرینه اهتمام بیوریلوب و قبودان و ضابطان و قالیونجی نفراتنک علوفه لرینی الدقلمده مانده به و جواله براقق کبی حالاتدن منع و تحذیر اولنوب بو صورتلرده ترسانه به نظام و بریلوب مصارف سائره غیر مهمه به صرف اولنان مبالغ امور ترسانه به خرج و صرف اولنوب هر برمازمه سی آتام و اکال بیورلدینی حاله بعونه تعالی دشمن دین دخی منزول اولوب معامله سی مجامله اوزره ایتمک مجبور اوله جنی ملحوظ عباد صداقت عنواندر .

دریان تکثیر و توفیر ایراد دولت علیه و تقلیل

مصارف زائده

هر بر دولته واردات و ایرادات میربه دائما مضبوط و کسته تار اولان نظام بلا مساعجه در عقب حسن رابطه به مربوط اولق مدار تقویت دولت اولدیننه بناء جمله دن اقدم و اهم و اقوای شروط ایراد دولت مصارفه غالب اولق خصوصی اولمله اوائل ظهور سلطنده انار بدویت ملا به سیله قلت مصارف و کمال قوت حیيله ایراد و مصارف خصوصی تدقیقندن هر تقدر اغماض اولنورسه دخی اواسط دولته وضع قوانینه احتیاج صورتلری دوام و استقرار ملک و سلطتی مستلزم نیجه دقائق خفیدن ماعدا ایراد و مصارف دولت ماده سی تعدیل و تنظیم ایله ایراد

مصرفہ غالب اولق خصوصہ متصرانہ سی و دقت و بو خصوصدن اغماض و ماسحہ برلہ امر برعکس اولق حالات و خیسہ سندن توفی و بجانب اتمک امر واجب الایمانہ مبنی ایدوکی اشکار و مصارفک ایرادہ غلبہ سی ضعف دولتی مقتضی اولسی بدیدار ایکن مرور ایام و کرور اعوام ایلہ بمضا وکلای دولت و امنای سلطنت متغافلانہ حرکت و اغماض عین ایلمرندن ناشی قوانین موضوعه معتبرہ ایلہ تسویہ پذیر اولش ایراداتک بعضی مختل النظام باخصوص تبدیل اطوار ایلہ وضع قانون زمانندن صکرہ اضعاف مضاعف زیادہ بی متحمل ایرادک مجدداً تسویہ نہ عدم دقت و اہتمام و بعضی دخی طمع خام سببی ایلہ بی انتظام اولوب بوجملہ ایلہ حضرت تقریبی ایلہ مصارف زائدہ و اسرافات دخی برطرفدن ایرادہ غلبہ ایتمک بوکونہ برآ و بحرأ واسع الممالک کثیر المنافع محمود الملوک و السلاطین اولان بلدان و امصار بی نہایہ بہ دولت علیہ عثمانیہ مالک ایکن خزینہ دولتہ طائد اولہ حق ایراداتک قتی و افری بیہودہ تلف اولدینی اجلدن ایام حضر باخصوص اوآن سفردہ ضرورت کشیدہ اولق حالاتی ظاہر و باہر اولق حسیلہ تأیید النظام بعدازین مجدداً تکثیر ایرادات و جمع ضایعات خصوصہ اقدام و بیہودہ مصارف غیر ضروریہ دن اجتناب ایلہ مدار قوت سلطنت اولان خزائنک توقیری ایلہ وقت حاجتہ مصارف ضروریہ سفرہ صرف اولہرق دشمن دیدن اخذنار و انتقام اولتمق مبادینہ شمیدین بذل ماحصل قدرت اولتمق درجہ وجودہ اہم مہامدن ایدوکی امر مستبان اولوب قالدیکہ بوکونہ مرور ازمہ ایلہ مختل النظام اولش ایراد و مصرف خصوصک کمال دقت و تحرری ایلہ تسویہ و تنظیمی خیرخواہان دولت اولان وکلانک نظارت و ہمتہ و امنای و ارباب استیفانک من غیر قصور و لاقنور متصرانہ سی و دقتلرینہ و ایراد و مصرف خصوصلرینی مو بمطالعہ و مذاکرہ و منصفانہ مشاورہ و مباحثہ لرینہ محتاج مواد مہمدن اولوب دفعہ کرکی کی

تسویه و تنظیمی متعسر اولدیغنه بناءً الحاله هذه جمله دن اقدم مقاطعات میریه تنظیمنه تشبث اولنوب عن اصل مقاطعات ایراداتی دفتر دارلر قبض ایدوب طرف میریدن ضبط و اداره اولنه کلور ایکن مقدا سپاه سرکلری خدمت نامیله طرف میریدن اخذ و هریر مقاطعه بی بر سپاهی سرکشی ضبط و معشیره تصدی و فقرای رعیتیه انواع ظلم و تعدیلرندن بشقه حاصلات مقاطعاتک جزئیات مقوله سی جانب میری به ادا و تسلیم و محصولات کلیه سی کندولری اکل و بلع ایلدکلری و بو کونه حرکات نامرضیه مجبرانه لرندن بالجمله قری اها لیلری پریشان و سرکردان و اکثر قریه لر خراب اولدیغندن ماعدا خسارت میریه نمایان اولدیغنه بناءً بو خصوصه اتفاق آرا ایله اولوقلرده نظام و یریلوب اولمقوله مقاطعات میریه بی اداره و رعیتی ظلم و عدواندن حمایته مقتدر بررکنه یه بروجه مالکانه تفویض اولنوب هریر مقاطعه دن حاصل اوله جق اعشار بالتحرری تصحیح و اول اوانده محصولاتک رایجلی اوزره بهاری تقویم و حساب اوله رق هریر مقاطعه تک اعشاری قیمتلی نه مقداره بالغ اولمش ایسه اول مقدار مبلغی مال اولوق اوزره بهر سنه طرف میری به ادا شرطیله ایراد قید اولنوب رسومات عرفیه و عوائدات قانونیه سی صاحب مالکانه یه فائض ترکیله نظام متحن و مقبوله ربط اولندقدن صکره رعایای ظلم و تعدیلدن حمایت و صیانت شرطیله هریر مقاطعه بی فائضه کوره معجله ایله بروجه مالکانه متصرف اولوق اوزره بررکنه یه تفویض ایتمکله سرکشان سپاهک یدلرندن بو وجهله تخلیص اولنوب بو کونه مقاطعات امواله مجددأ مال ضعی خصوصه اکثریا اعتنا اولنمیدنی جهندن همان اکثر مقاطعات خطه تک کیلی سکز اون پاره یه وسائر محصولات اکا قیاس رخیص ایکن تمین اولنان مال میری ایله قالب لکن مرور زمان ایله خطه تک بهر کیلی قرقر الیشتر پاره یه رسیده کذلک محصولات سائره تک دخی بهاری مترقی و رسومات عرفیه دخی شیافشیا متزاید اولغله حین احدات

مالکانه ده بر مقاطعه نك حاصلاتك خمسى مقدارى اصحاب مالكانه به فائض
 قالمق اوزره ترك واربعه اخاسى رتبه لرى جانب ميرى به مال مقيد تعين
 و تخصيص اولمشيكن بر منوال محرر ترقى بهاي محصولات و ترايد واردات
 و رسومات تقريبيله اليوم اكثر مقاطعاتك فائضرى مقدا تعين اولنان
 مال ميرلرينك بش آلى قاته بالغ اولغله اول مثلوكثير الفائض مقاطعه لر
 محلول اولدقجه كثر فائضه كوره معجله قديمه سنك اضماف مضاعفه
 بعد المزايد قرار داده ايله برات و يرلك خصوصنده دفتر دار اقتديله
 اداره مصارف ميريه ضمنده همان بروجه تعجيل معجله سنى ميرى ايچون
 قبض و صرف فرنده سهولت اولديغه بناء قديمدن معين اولان مال ميرينك
 اوزرينه ضم اولندينى تقديردده فائض مقاطعه متدى و معجله سى منزل
 اوله جفنى دفتر دار لر ملاحظه ايله مصارفات مستعجله سى اداره ده تعب
 كشيده اولقى و اهمه سنى ابتساء اموال مقاطعات محلوله به مجدداً ضم
 خصوصه اعتنا و رغبت ايتيوب اول مقوله فائضى مالك بش اون قات
 ضعى اولوب محلول اولان مقاطعه به ضم ميرى خصوصى دفتر دار لر
 بنده لر به تيه و تكليف اولنه دخى مال مقاطعه به ضم منزل و تدنى
 معجله سى موجب اولوب ضم اولندينى صورتده معجله نك ترايد و ترقيسى
 مستوجب اولغله ضم خصوصنده ميرى به نفع اولما ديغدن ماعدا بروجه
 تعجيل ميرى به عائد اوله جق آقجه بش آلى سنده تحصيل ايله تاخير
 اولنوب مضرتى ملحوظدر ديومغالطه برله اجتناب ايله جكلى اوضاع
 و اطوار لرندن نمونه دار اولوب مع هذا مقاطعات ميريه آلى بدى نهايت
 اون سنه لك فائضدن زياده به و يرلديكى اوليوب اكثرى بش آلى
 سنه لك فائضى ايله و يريله كلديكنه بناء و اكثر مقاطعات قسريد ايله
 متصرف لرندن بر لرلرينه انتقال ايتكله مدت مديده محلول اوليوب
 و اكثرينك دخى اصحابى معمريندن اولغله يكرمى اوتوز قرق سنه
 مالكانه لر به تصرف لرى حيله ايراد ايلدكلى اعذار و ايه نك بطلانى

ظاهر اولمقدن ناشی اول مقوله ایراد اولنان کلمات وهمیه حواله سمع اعتبار بیورلیوب فیابعد کثیر الفاضل مقاطعات منجمله و محلوله اولدقجه حاصلاتی بطریق الاتقان تصحیح و خارجه چیقاریلوب متعین ومتین اولدقدن صکره اول مقاطعه تک حاصلاتک نلثانی مرتبه رسیده اولنجه قدیمی مالی اوزرینه مال ضم اولنوب نلثی مرتبه سی فائض قالمق اوزره طابالبرینه سکزر اوزر سنه تک مقداری معجله ایله ویریلدیکی صورتده ایرادات دولت علیه یوماً فیوماً متزاید اوله جفندن بشقه رفته رفته صدراعظملرک ودفتردارلرک قلبیه لری دخی تزایدی قبول ایدوب برمدندن برو صدراعظملرک ایرادات معینله لری مصارف ضروریله لری احاطه ایتمدیکی اجلدن وزرای عظامه و میرمیران کرامه توجیه بیوریلان ایالات والویه لردن جائزه قدیمه لردن فضله تبشیریه و تبریکیه وسائر اسم بیمنی ایله بالضروره اخذ ایلدکلری مهدئاتک مرتفع و بو تقریب ایله وزرای عظام و میرمیران کرام دخی منصب لردن منتفع اولوب ضرورتلری برطرف اولقله سفر لرو قوغنده مکمل قبولری خلقلری ایله انبات وجوده مقتدر اوله جقلری بی اشتباه اولوب لکن بو وسیله ایله محلول اولمیان مقاطعاتک اموالنه ضم میری خصوصندن اجتناب لازمدرکه اصحاب مالکانه معجله کثیره ایله اولوب هنوز ویردکلری معجله بی استیفا ایتمدکلری جهتله ضم خصوصنده مفدور اوله جقلری نمایان اولقله ضم میری محلول اولان مقاطعاته مقصور و منحصر اولمق اوزره تأکید و تئیه بیورلمق مقتضای رسم عدالت اولوب و دولت علیه تک اعظم ایراداتدن اولان کمرکلر از قدیم امانه ضابط اولنوب بهر سنه حاصلاتلری تکلفسز جانب میریدن اخذ و استیفا اولنور ایکن کویا دفع ضرورت میریه به مدار اولمق ضمننده محلول اولدقجه معجله لردن طرف میری به منافع کلیه حاصل اولمق اقوال سخیفه سنه بناء کمرک امتعه و کرک دخان کمرکلری وسائر بعض جسیم مقاطعه لر قریب العهدده بعضیسی دردر و بعضیسی بشر و بعضیسی آلتیشر سنه لکنه بروجه مالکانه برات

ایہ طابلقرینہ حاصلاتلری توزیع اولنوب اشبو احداث اولنسان سهام
 هدف ایرادات دولت علیہ سهام قضا قیلندن اولدینی قرضاً دخان کرکی
 سہم اولدینی وقتدن بوقته کلنجہ اصحاب سهامہ بہر سنہ ویریلان مبلغ
 سهام مرقومہ دن محلولہ اولانلرک معجلاتی وقت احدائندہ النان معجلات
 ایہ جمع اولنوب ویریلان ایہ موازنہ وحساب اولندقدہ جانب میری بہ
 خسارت عظیمہ سی اولدینی بالبداهہ ظاہر وآشکار اولہ جق مواددن
 اولقلہ اشبو خسارات محدثہ نک دفع ورفی ضمتدہ فیابعد محلول اولان
 سہملر بر فردہ فروخت اولنمیوب و متصرفلرینک اجانبہ فراع وقصر
 تدلرینہ اصلاً مساعدہ بیورلمدینی صورتدہ وقت یسیردہ زخم خسارت
 سهام مرہم پذیر اندفاع والتیام اولوب طرز قدیمہ رجعت ایہ بعونہ تعالی
 قریباً ایرادات میری بہ وسعت کلہ جکی بدیدر وانفیہ مقاطعہ سی دخی
 خلی جیم ومایہ نفع عظیم برمالکانہ اولوب لکن اعمال اولنان انفیہ نک
 قورفہ وایئہ انفیہ لری مثلو جودت ولطافت ومقبول اہل طیمت
 اولہ جق درجہ لردہ اعمالہ ملتزم لر اصلاً دقت ایلدکلری اجلدن اکثرناس
 طشرہ انفیہ سنہ محتاج اولدقلرینہ بناء کارخانہ دہ اعمال اولنان انفیہ دہ
 رواج اولماقلہ فیابعد الزام اولنمیوب یوز بیک غروش مقداری سرمایہ
 جانب میریدن اعطا ایہ برمعمد وکارگذار امین تعیین وبالامانہ اعمال
 ابتدیریلوب شروط سربستلکی مرعی اولہ رق جید دخان ایہ جودت
 اوزرہ اعمال اولنمنہ دقت اولدینی صورتدہ جانب میری بہ سنوی یدی
 سکز یوزکیہ مقداری منافع حاصل اولہ جق مجزوم اولوب وہرملکدہ
 معادن اولمیوب بحمدہ تعالی دولت علیہ تمالکی اول جہتدن دخی ممالک
 سائرہ دن ممتاز ایکن برمدتدن برو اعمال معادن خصوصندہ کافی السابق
 اہتمام اولنمدیندن سیم وزردہ قلت درکار اولمقدن ناشی بعدالیوم ارغنی
 وکبان معدنلری وکمشخانہ وسائر معادنک کیفیتلری اربابی ایہ کرکی کبی
 مذاکرہ ومشاورہ اولہ رق ہر برمدنہ برمعمد وکارگذار امین وصداقتکار

کسندر انتخاب و تعیین اولنوب هر برینه مقدار کفایه سرمایه اعطاسیله
 بالامانه ضبط ایندیریلوب معاون مرقومه سربست اوله رق ضبط اولنه کلکله
 اطراف و اکنافلرنده واقع قضالره وسیله مظالم و مدار جلب طیارات و منافع
 ایجامک خصوصی امنای مرقومه به بوجه تحذیر و تهدید افهام و ظلم و تعدی
 و خیانت و اهانت تصدیق و سائر فضایح و خیانتلری ظهورنده تأدیب و کوشمال
 اولنه جقلمی افاده ایله خیانت و خیانتلری ظهور اتمدیکی حالده عزل
 و تبدیل اولنیوب خاصه مأموریتلری اولان معاذنی اعمال و کرکی کبی
 سیم وزر استخراجی خصوصی کندولردن مطلوب اولدینغی و خصوص
 مرقومه کمال مرتبه سعی و اهتماملری تأکید ایله محل مأمورلرینه
 ارسال اولندقلری صورتده معادن جانلرندن دخی فوائد کثیره ظهوری
 اوائل حال معاذنی تفحص ایله منفهم اولور قالدیکه دولت علیه نك ذهب
 و فضه سی جمله دن زیاده اوج ماده ایچون دول سائر به کتمکه اول مواد
 نك نك منعی رجال دولت غنانه و عامه ناسک رفاه حال و استراحتلرینه
 باعث اوله جنی بی اشتباه اولقله اولا بعد الیوم یکی دنیا جانندن طائفه
 افرنجک کتوردکلری الماس منع اولنق واجب اولقله فیابعد اول مقوله
 احجاری افرنج تجاری کتور مامک اوزره داراللطنه ده مقیم دول نصاری
 الجیلرینه تنیه و تأکید بیوریلوب منعی خصوصه اقدام لازمدر زیرا
 هجر مقوله سندن اولان جوهر بی فائده ایچون خزینه لر اتلاف اولنوب
 فی حد ذاته طاش اولقله و قنده ایشه یرامز مع هذا فرنکلر کندولری
 و نسالری یلانجی طاشلر استعمال ایدوب الماس استعمال ایتزلر و اول
 طاشلر ایله دولت علیه نك و رجالنک مالی خزینه خزینه دیارلرینه
 کتورلر تانیاً مسقو کفره سنک کلی ابرادی کورک انواعی اولوب
 و کندو مملکتلری ارض تسعنه قریب اولقله برودتی معلوم ایکن قورد
 و چقالدن غیر ذی ذی قیمت کورک استعمالی کلیاً مملکتلرنده ممنوع
 اولوب کذلک ممالک سائر افرنجده دخی ذکور و نسا بروجله ذی قیمت

کورك استعمال ايتيوب و طائفه اعجاب دخی مذهب رينه كوره كورك دباغت قبول ايتمز دبو انواع كورك كيميوب اكثرى قوزى كوركى كيوب و هند و فاس اراضى سى دخى غايت خار اولمغه هنديلر و مغربيلر كورك كيمك دكل بلكه كوملكجك كزوب و الحاصل مسقوك كورك متاعى دولت عليه دن غبرى سائر دوله رايح اوليوب سنوى دولت عليه اراضيندن اون بيك كيه دن متجاوز كورك ايجون مسقو ديارينه كيدوب مع هذا دولت عليه اراضينده اون بش يكرمى نوع مقدارى كورك چقار ايكن انلره اعتبار اولنميوپ مسقوه خزينه لر كيدوب تقويت ويريلور دول نصاراده عادت كندو ديارلرنده بر متاعك ادناسى بولنور ايه سائر ديارده اول متاعك اعلاندن بولناه ميل ابدنى اعدام ايدرلر بوسورتده كورك ماده سنه بر نظام و يرلديكى صورتده دولت عليه ممالكى اهالىسى غنى و مسقولو بولندقلرى حالدن زياده مفلس اوله جقلرى غايت دقيق بر معنى اولمغه تنظيمى ملك و دولته نافع بر امر مهمدر ثالثاً حلب و شام و بروسه و ديار بكر و سائر ممالك عثمانيه ده و بالنفس اسلامبولده انواع اقشه نسج اولنور ايكن امتعه هنديه ايجون بي نهايه خزينه لر هنده كيدوب و اول طرفلره كيدن ذهب و فضه بر دخى دولت عليه ممالكنه كلامك كرك الماسك منى و كرك كورك ماده سنك تنظيمى و دستار و كتفى شالدين ماعدا هند اثوابك دخى كلياً منى خصوصى دولت عليه به غايتله انفع امور دندر .

(مابعدى وار)